

पं ग वा डी मा सि क  
प त्रि का

# तुबारि

जरुत - नौकरी - जरुत  
नौकरी जे यक लिखो पढो मेहणु लौता  
जे सोच कइ कुछ लिख सकता  
✪ खरी तनखा मेति ✪  
सुआ जानकारी जे ☎ 9418721336

## तुबारि संपादकीय टीम

- ◆ अस इ उम्मिद करं लगे से कि एण बाड़े दिन अन्तर सुआ मेहणु इस कम अन्तर सहयोग कते।
- ◆ इस तुबारि मासिक पत्रिका समाचार पत्र एकट अन्तर रिजिष्ट्रि नेई भो। सिर्फ पांगि घाटि अन्तर पढ़ू जे इ पत्रिका शुरु कियो सि।
- ◆ तुबारि यक अवाणिज्यिक पत्रिका भो।
- ◆ तुबारि पत्रिका कोइ मेहणु, जनजाति, त संस्कृति गलित कहेण जे नेई छपाण लगे। अगर कोइ ई सोचता बि त अस जिम्मेवार नेई।
- ◆ छपाणे पेहले सोभ आर्टिकल दुई टाई पांगेई मेहणु हरा लो असे। इ त खुलि बोक असि कि पेहिल बार पांगवाडि लिखणे सुआ मुशकिल भुन्ति त गलति बि भुन्ति। अगर कोइ लिखणे गलति असि त असि जे जरूर बोले। त अस तसे होरे संस्करण पुठ ठीक करणे कोशिश कते।
- ◆ आर्टिकलस ना मिलए, या घाटि मेहणु के मदद ना मिलए त तुबारि पत्रिका कदि बि बंद भुई सकति।
- ◆ कोइ चिज छपां सि या नेई छपां जे तुबारि संपादकीय टीमे पुरा अधिकार असा।
- ◆ अस सोभि पांगि मेहणु जे हात जोड कई निवेदन कते कि, तुस बि कोइ अछा आर्टिकल, पुराणि या नौइ कथा, कहावत, कविता, त नौवे घीत (पांगवाडी अन्तर) लिख कइ छपां जे हेंनदे दिए।
- ◆ अस किलाड केन्द्रीय पुस्तकालय, त बजार राखे ठेके भैड हरिरामे दुकान अन्तर तुबारि ड्रॉप बॉक्स पुठ बि अपु सझाव ओर आर्टिकलस रखुं जे सुविधा कियो असि।

☎ 9418431531

☎ 9418429574

☎ 9418329200

☎ 9418411199

☎ 9418411599

## सच्चाई तालू

कुछ साल पेहले समाचार पत्र अन्तर, मुम्बई शहर यक 15 साले कोइए बारे छप्पो थी। से अपु कमरे अन्तर अपु ईया जुओई विशताथ। सोभी ईया के ई तेसे ई बि तेस जे रोज बोतिथ, “पढीं दे कोइआ पढी दे”। बोते-बोते, यक रोज कुआ बुडी बुछ बहस भुई गई। कुआ गा त अन्तरा आटी केआं चिआकू घिनि आ। जउं तकर से मर न गई, तउं अपु ईया पुठ देन्ता रेहा। तउं तेनि अपु झिणे, जे लेहुए बई भरिए थिए धोई छाई। तउं अलमारी केआं रुपेई कढे त गीहा नशी गा। टाई रोजे पता से पुलिस-बाडि टाई छा। पुलिस-बाडि जिखेई तेस केआं पुछु कि “तेई अपु ई किस मारि”? तउं से बोता कि “मेई दश लिंगीं ‘वास्तव’ फिल्म हेरो थी, जेथ अन्तर सुआ मेहणु मारतेथ। तेस अन्तरी हीरो मेहणु मारणे होरे-होरे तरीके हरा लतथ से मोउं अबुल लगे”। जपल से गभरू के जेल अन्तर छा, त तिखेई तेस केआं तेठियेकण डाक्टरे पुछु कि तेई अपु ई किस मारी, तेई ई किस किउ? तिखेई से अपु कियो पुठ पछताण लग गा त बोलु “पता नेई मेई ई किस कियु”।

केतने फेरी, मेहणु पता न लगता कि से टी वी हेरते त तेन्ही पुठ तेसे असर भुन्ता। अस जे टी वी पीटि नाटक त प्रोग्राम हेरते, घीत शुणते, तेन्ही सोभी के मेहणु पुठ सुआ असर भुन्ता। हें मन शुक्की ऊन्नि केई असा। जीं शुक्की ऊन्ने पौणि चूशि छेति, तिहांणि टी वी पुठ जे नाटक लगते, तेन्हि हें मन चूश छता। तउं त असी अन्तर खरे त खोटे पछाण लोति। जीं अस चाह तेलणु बाई तालि कई पत्ती भीं कढते, तियाणि असि अपु दिमाग लाई कइ नाटके सच्चाई जीं ब्याह केआं पेहले परहेज रखुण, धाणि जुएलि बुछ बफादारी, ईमानदारी, अहिंसा, मोटी के बोक मनी त तन्के इज्जत करीं, झूठ ना बोलुं, चोरं जारं नाउ, कुई धुई ना छेडीं, लेहरीं नाउ आदि पता लगो लौता। टी वी बाडे असी समझाण जे नाटक, प्रोग्राम त घीत बणान्ते। अगर अस तेन्हि ताल कइ ना हेरियेल त अस पुठ खोटा प्रभाव पडता। तउं अस बि तेस कोइए ई कोइ बि गलत कम कइ सकते। कोई बि प्रोग्राम अन्तर, ब्याह केआं पेहले परहेज रखुण, धाणि जुएलि बुछ बफादारी, ईमानदारी, अहिंसा, मोटी के बोक मनी त तन्के इज्जत करीं, झूठ ना बोलुं, चोरं जारं नाउ, कुई धुई ना छेडीं, लेहरीं नाउ आदि गुणी के भूण जरुरी असु। जपल बि अस नाटक त फिल्म हेरते तउं असी एन्हि सोबि बोकि के ध्यान रखण चाहिए। जेहिन नाटक त फिल्मी अन्तर ए: सोब गुण न भोल त से ना हेरुण असी जे बढिआ असु। किस कि अगर ए: गुण मेहणू अन्तर ना भोल त हें समाज त संस्कृति सुसुर ना रेहन्ति।



अस जे टी वी पीटि नाटक त प्रोग्राम हेरते, घीत शुणते, तेन्ही सोभी के मेहणु पुठ सुआ असर भुन्ता। हें मन शुक्की ऊन्नि केई असा। जीं शुक्की ऊन्ने पौणि चूशि छेति, तिहांणि टी वी पुठ जे नाटक लगते, तेन्हि हें मन चूश छता। तउं त असी अन्तर खरे त खोटे पछाण लोति।

## इस मेहने केआं तुबारि मासिक पत्रिका यक साल भोई गई।



तुबारि संपादकीय टीमे कनारा सोबी तुबारि पढ़ू बाडि,  
लेखक त दुकानदारी के मदद जे धन्यवाद,  
“जुग-जुग जिये” ओर जुकारू बधे!



**मिनु** नउए यक कुई थी। से बड़े जोर जोई दौड़तिथा। जपल से बड़ि भोई गई त तेनि सुआ दौड़ुणे प्रतियोगिता जीती। त तेस सुने कॅप (gold medal ) बि मेईए। पता मिनु अपु दौड़ुं हेर कइ सुआ रोभ किद्धतिथा। बोतिथ कि, इस दुनिया अन्तर कोइ मोउ ना हराई बटता। यक रोज मिनु कुछ समान खरिदण जे बजार गो थी। त यक चोर तसे हतेउ केआं झोडा छुडकाइ कइ दौड़ि गा। जपल मिनु चेता आ त तउं तकर से चोर सुआ दूर घेई गोओ थिआ। तउं मिनु तस हेर बोति “दौड़ दे, केतु दूर दौड़ता तु। तउ पता नेई कि मेई केति प्रतियोगिता जीतो असी। अभेई हारालति तउ अउं”। त अपु बूटे त झिणे सुसरेरी कइ से बि चोरे पतोति बड़े जोर जोइ दौड़ गई। कोइ पंज मिनट अन्तर से चोरे निड्डु भुण लगि। त चोर पतूं हेर कइ अपु सोब जोर लाई कइ दौड़ा। मिनु हेरति कि चोर अपु पुरा जोर लोओ सा, त तसे अपु प्रतियोगिता चेता एन्ता, तेन बि दुगना जोर लाई कइ दौड़ दिति। तसे मन ए मेहणु मोउ जोइ बुडक लाण लगो सा। हारालति एस। बिचारे चोर कुछ दूर घेई कइ दमा एण लगा त से मठे दौड़ु लगा। पर मिनु तेस केआं अगर दौड़ि गई त कोई दुई मिनट तकर दौड़ति रेहि। चोर हेरता कि मिनु अगर दौड़ु लगो असी त से अपु बथ बदल कइ होरि बथे बई खिसक गा। पर जपल मिनु चेता आ त तसे पता लगा कि से चोर टाण जे दौड़ दुतो थी। त चोर को गा? जपल से पतूं हेरति त चोर तठिआ गायब थिआ। बिचारि खालि हाथ गी एन्ति। वापिस एणे टेम बथ से सोचति कि बेशक अउं दौड़ुं अन्तर खरी असी। पर चोर बि अपु कम अन्तर उस्ताद असा। न तो से में झोडा छुडकाइ कइ कीं फरार भोई गा।

इस कथा अन्तर शिचिणे बोक इ असी कि भाई असी अपु कमजोरि पता लगो लौता ताकि अस रोभ ना करिएल त होरे मेहणु हें इज्जत कते। सोब मेहणु अन्तर कुछ न कुछ खूवि भुन्ति त हें मन अन्तर ई ना लौतु कि “इ मेहणु कुछ कमे नेई”।

### कुछ खास खबर

- ◆ पांगी घाटि मुख्यालय किलाड, पुरे जोरशोर जुएइ 26 जनवरि (गणतंत्रता दिवस) मनाई।
- ◆ सुआ डंगे शिणे बझइ जुएइ गभूरु स्कूल केआं फरवरी 15 तकर छुटी मेई गोसी।
- ◆ बि.एस.एन.एल बाडि के मशीने खराप भूणे बोलि हफ्ते रोज सिगनाल ना आ त हउ बि मेहणू घट सिगनाले बोलि परेशान असे।
- ◆ धरोस ग्रां अन्तर आग लगणे ब्रोलि त्रेई टोले गी फुकी गो।

पिंकी त लकि बोक करुण लगो से .....

By Shubham

ओ लकि, तु बोक कते कते खन किस खाण लगो असा?



गुरुजीए बोलो असु कि सोबि जुए मीठी बोक करीण। तउं त अउं खन खाण लगो सा।

ADVERTISEMENT/ BEST WISHES FOR MARRIAGES, BIRTHDAYS, RETIREMENTS Etc. Please ☎ 9418429574

## पंगवाड़ी लेखक प्रतियोगिता

तुबारि संपादकीय टीम, लेखक प्रतियोगिता करणे किओ असि। त कोइ बि मेहणु सिर्फ पंगवाड़ी (किलाडे बोली या साचे बोली) अन्तर कथा \* त लेख लिख कइ 2012 फरवरी 29 तकर किलाड राजकीय पुस्तकालय (महातम जे) या किलाड बजार अंग्रेजी ठेके भैड हरी रामे दुकान पुठ दी सकते। लेख अन्तर अपु नाउ, ग्रांए नाउ त फोन नंबर लिखुं बिसरीं। हें निर्णायक कमेटी सोबि केआं बढिआ लेख चुणते। से लेख लिखु बाडि जे तुबारि संपादकीय टीम कनारा 500 रुपेइ ईनाम मेति त तसे फोटो त लेख तुबारि पुठ बि छपति।

**पेहला ईनाम 500**

\* मिन्धल माता, टटण माता, शीतला माता त नाग देवता कथा छड दी कइ कोइ बि कथा लिख सकते।